

LI MON.NÎ, SI FI ÈT L' BAUDÈT.

Dji m' vos va raconter l'istwêre di nosse mon.nî
Qu'aveut dècidé d' vinde si baudèt div'nu vî.
On lî a garanti qu'à l' grande fwêre d'Inguèzéye
Il avin.n' trové l' truc po lès vinde à l' passéye.
Avou l' pus vî d' sès fis, on rèfwârcî gamin,
Vo-lès-la démarés à quatre eûres au matin.
Po qu'èle fuche présintauve, i faureut spaurgnî l' bièsse !
Ça fait qu'on lî alache sès quate pîds à one pièce,
Èt pwîs l' taper à spale, peû d' fé roter l'baudèt.
Nosse bièsse, qui ça lî va, n' pout mau di d'mander qwè.
Vèyant l' tâblau, on-ome qui passeut, s' pète à rîre :
– Dj'a conu dèrs rwèds fôs ! Cètici, c'est co pîre.
Li pus bièsse do moncia, c'est nin l' ci qu'on pinsereut !
– T'aureus co bin raîson ! Vaureut mia qu'i rotoreut.»
Mins l' baudèt, tot pitieûs, faît comprinde à s' maniére
Qu'à l' place di yèsse jin.nés, i d'vrint putôt yèsse fiérs.
L'ome ni vont rin ètinde, il aurè l' dêrin mot :
Po mostrer qu'il èst maîsse, i mèt l' gamin su s' dos.
I crwèsenut trwès mârtchands : – Comint faut-i comprinde
Qu'on parèy djan-cocoye si pawine sins v'lu rinde
Si place, come i l' duvreut , sins tchiketer, à ç't-ome-là ?
– Dji m' vos va continter ! Dischindoz, m' fi, di d' là !
Dji m' va r'pwaser one miète, èt vos roterozi pus rade !»
Èt zoubler su l' baudèt qu'on n'a nin compté quate.
– I m' chone qu'i vaureut mia qu'on montereut chake à toû !
One dimèye eûre à dos, vo-t'-la r'mètu à noû.»
Saquants cints mètes pus lon, i veûyenut deûs coméres :
– Qu'èst ç' qui c'est d' ça por onk ? Vos lomez ça on pére ?
On dîreut veûy li pâpe, one tièsse di tch'vau godin ;
Ça n'a d' cure di pèrson.ne, èt co mwins' di s' gamin !
– Ci qui n' tchaufe nin por vos, vos l' duvrîz lèyî boûre !
Après deûs djoûs d' solia, vos d'mandez quand qu' ' va ploûre !»
Tot r'tûzant à tot ça, i chone qu'il a mau faît,

Èt i d'mande à s' gamin : – Rimontoz, s'i vos plaît !»
Tos lès deûs su l' baudèt, i faîyenut saquants pas,
Qui deûs vîs s' présintenut tot fiant d' leûs-embaras :
– N'estoz nin come nosse gade ? Èst ç' qu'on kèdje one bourique
Come vos l'avoz là faît ? Vosse pôve vî dômèstique
Qu'a faît tot ç' qu'il a p'lu èt bouter, èt fwârcî !
I m' chone qui, por on côp, vos-î pôrîz sondjî !»

I d'chindenut tos lès deûs. Li baudèt, pad'vant zêls,
Vèrineut èt wignî do cu come one mamesèle.
Li baron, vèyant ça, si d'mande quî ç' qu'a sondjî
À porminer l' baudèt, èt lès-omes chûre à pîds.
– Toûrnez ça come vos v'lôz, i-gn-a jamaîs pérson.ne
Qui troverè qu' ça s' pout fé, dau pus vî j'qu'au pus djon.ne !
On djoûwe avou t' quinzin.ne, èt ti nî vès qu' do feu ?
Dimwin, gn-a pus nèlu qui roterè l' drwèt do djeu !»
Nosse mon.nî, tot sbaré, qui tot ça toûne è s' tièsse,
Si d'mande ci qu'i freut bin po-z-ariver à yèsse
On-ome qui faît à s' môde, vèyu voltîy dès djins,
Qui n' tûze à rin d' contraîre, po qu' tot l' monde fuche contint.
– Dj'a l'idéye qui, ç' côp-ci, dj'a trové l' boune rèsponse ;
Pus jamaîs dji n' passerè po l'înocint quatôze
Qui, tot fiant ç' qu'on lî dit, toûne avou tos lès vints,
Parèy à l' rabanêre, peû d' choquer lès vijins.
Vosse mon.nî v's-advêrtit, tant pîre po l' ci qu' ça jin.ne ;
Dji vos prévin qu' c'est tot, qu'on dîrè co qui dj' crin.ne !
“Fwè d' mon.nî, dji v's-anonce qu'à paurti d'audjoûrdù,
Li ci qui cause su m' dos, qu'i sèpe qu'i cause à m' cu !“

Ci qu' dj'a conté véci, c'est po qu' vos compurdoche :
Qui vos fuchîche patron, ou-z-aler à l' piyoche,
Mârier one bèle comére, ou tchwèsi d'yèsse curé,
Lès djins troveront todì à r'dîre po v's-embêter.
Si lès cis qu' causenut d' mi pôrint seûlemint comprinde

Qui tot ç' qu'on dit su m' dos, dji so près' à l'zî rinde,
Parèy à one bowéye di novias canadas,
Qui, por one pitite plante, on-z-è rauye on saya.
Si, audjoûrdu po d'wmin, il advinerint ç' qu'i dj' pinse
Di zèls, ostant qu'i sont, i lancerint à non syince,
Tot lès mètant su m' dos, one masse di mèchancetés !
I sèrint co branmint pad'zo l' pure vèrité.

Albert Delvaux
Jun 2011

Djan-cocôye : benêt.

Si pawiner : se pavanner.

One tièsse di tch'vau godin : monture en osier représentant la carcasse d'un cheval (carnaval).

Vèriner : se tortiller.

Wignî do cu : agiter l'arrière-train.

Rabanêre : girouette.

Crin.ner : crisser en freinant.